

Abstract

Rolla e maletg catolic da la dunna

Funtaunas scrittas ed oralas da la Surselva catolica rumantscha fin il 1950/60 dattan invista en in mund fitg different da quel dad oz. Ellas mussan ina moda da viver da tempru preindustrial-agrara, nua che valevan normas religius-moralas rigidas. L'uschenumnada «lavina naira», sco expressiun regiunala dal maletg dal mund catolic-conservativ, era ultra da quai marcada d'ina schientscha politica fitg ferma, da la cultura alpina e da la lingua rumantscha. Il studi preschent intercurescha funtaunas normativas (litteratura edifitganta, periodicas regiunalas e litteratura populara en general) spezialmain areguard las spetgas da la societad visavi las dunnas. L'effect da questas normas vegn era examinà a maun da testimonianzas persunalas da dunnas. Il studi na vul betg dar in'invista cumplexsiva en il sentiment da vita da las dunnas da lez temp, mabain sa concentrescha sapientivamain sin aspects ideologics.

Il maletg catolic da la dunna che sa mussa qua ha duas caracteristicas principalas: d'ina vart vegn el deducì da l'istorgia da la creaziun dal mund, el è damai vulì da Dieu e nunmidabel. Da l'autra vart ha el chattà sia furma la pli perfetga gist en il cristianissem; concepziuns oppostas betg cristianas e modernas vegnan consideradas sco regressivas. Tenor il puntg da vista catolic aveva la dunna da sa suttametter a l'um ed era destinada per la rolla da la consorta e mamma che sa sacrifictescha per ils ses. En il tegnairchasa e sin il furs eran sias forzas e qualitäts dumandadas gist tant sco en famiglia, nua ch'ella era l'istanza morala per il consort ed ils uffants. Igl era l'incumbensa da la dunna da transmetter valurs religiusas, linguisticas e culturalas sco era da tgirar ils malsaus ed ils vegls. Quests ideals e questas normas eran integrads en ina pratica da mintgadi religiosa intensiva che ha gì in effect enormamain stabilisant areguard l'attribuziun da las rollas specificas da l'um e da la dunna. Il fatg che caracteristicas essenzialas da la societad tradiziunala èn vegnidas mantegnidas fin vers la fin dal temp intercurì, ha anc rinforzà quest effect en il territori alpin.

Ditg curtamain: Las dunnas avevan incumbensas impurtantas en la societad ed ellas pudevan tuttavia quintar cun stima e renconuschientscha, sch'ellas ademplivan quellas conscienziusamain. Ins po perquai observar sco fenomen che las dunnas rinforzavan per regla anc lur submissiun e gidavan plitost a mantegnair il maletg da rollas che d'al metter en dumonda. Da l'autra vart tutgi tar l'ambivalenza dals fenomens examinads che gist la baselgia ha fatg pass impurtants che han gì per consequenza che las dunnas han mess en dumonda lur rolla tradiziunala. L'integraziun da las dunnas en uniuns catolicas e lur preschientscha publicistica tempriva èn bain vegnidas promovidas cun intenziuns basadas sin valurs conservativas. Quests champs d'activitad purschevan dentant a las dunnas ina plattafurma per articular lur interess e lur giavischs. Ils novs spazis d'acziun han damai contribuì essenzialmain a l'erosiun successiva dal maletg da la dunna tradiziunal ils onns 1950 e 1960.